

मार्निंग डोगरी न्यूज़ बुलेटिन, सभें. 09-20 Hrs

<><><><><><>

Headlines

- जम्मू कश्मीर विधानसभा चुनावों दे दुए गेड़ दे मतदान च कल 57 प्रतिशत कोला मते लोकें वोट पाने दे अपने अधिकार दा इस्तेमाल कीता।
- दुए गेड़ दा मतदान पूरी चाल्ली रमानदारी ते बवस्था आले ढंगै सिर तोड़ चाढ़ेआ गेआ। कुसै माड़ी घटना दी कोई खबर नेई। विदेशी राजनयिकें जम्मू कश्मीर च इस लोकतंत्र दे उत्सव दी सराहना कीती।
- जम्मू प्रांतै च त्रीए गेड़ दे चुनावों लेई प्रचार तेज। गृहमंत्री अज्ज ते प्रधानमंत्री होर 28 सितम्बर गी चुनावों प्रचार लेई आवा'रदे न। राहुल गांधी होरें कल जम्मू च चुनावों प्रचार कीता।
- प्रधानमंत्री नरेन्द्र मोदी होर अज्ज मुख्खै अंदर तैआर कीते गेदे 3 सुपर कम्प्यूटर राष्ट्र दे नामित करगंन।
- भारत दे कमल चावला ल। आईबीएसएफ विश्व 6 रैंड बाल स्नूकर प्रतियोगिता च सुन्ने दा तगमा हासल कीता ऐ।

<><><><><><>

Rev. EC-J&K

जम्मू कश्मीर विधानसभा चुनावों दे दुए गेड़ च बी लोकें बधी चढ़ियै वोट पाने दे अपने अधिकार दा इस्तेमाल कीता ते कल होए दे चुनावों च 57.0–3 प्रतिशत मतदान दर्ज कीता गेआ। श्रीनगर, बडगाम, गांदरबल, पुछ, राजौरी ते रियासी जिलें च फैली दिएं कुल 26 विधानसभा सीटें लेई वोट पोआए गे। चुनावों आयोग आस्सेआ उपलब्ध कराए गेदे ताजा आंकड़े मूजब जम्मू प्रांतै दे रियासी जिले च सब्बने शा मता 74.7 प्रतिशत, पुंछ च 73.8 प्रतिशत ते राजौरी जिले च 70.9–8 प्रतिशत मतदान दर्ज कीता गेआ। जिसलै जे कश्मीर घाटी दे बडगाम जिले च सब्बने शा मता 62.9–8 प्रतिशत, गांदरबल च 63.5–1 प्रतिशत ते श्रीनगर जिले च सब्बने शा घट्ट 29.8–1 प्रतिशत लोकें वोट पाने दे अपने अधिकार दा इस्तेमाल कीता।

विधानसभा हल्के दी जेकर गल्ल करचै श्री माता वैष्णो देवी विधानसभा सीट पर सब्बने शा मता 80.7-4 प्रतिशत मतदान दर्ज कीता गेआ जेह्दे बाद सुरनकोट ते पुंछ हवेली दुए ते त्रीए नंबरै पर रेह जित्थें बिलतरतीब 74.9-5 प्रतिशत ते 74.6-6 प्रतिशत मतदाताएं वोट पाए। चुनां विभाग दा आखना ऐ जे कुल मतदान प्रतिशत च सारे आंकड़े जमा होने दे बाद दना क होर बाद्धा होई सकदा ऐ। भारत दे मुख चुनां आयुक्त राजीव कुमार होरें आखेआ ऐ जे जम्मू कश्मीर च होआ'रदे विधानसभा चुनां इक इतिहास कायम करै करदे न की जे इत्थूं दे लोकें हिंसा ते चुना वहिश्कार आले रमै गी नकारदे होई लोकतंत्र च अपना गैह्रा विश्वास प्रगट करदे होई इसी गले कन्नै लाया ऐ। उनें आखेआ जे चुनां पूरी चाल्ली रमानदारी ते पारदर्शी ढंगै नै करोआने लेई सुरक्षा दे निगगर बंदोबस्ते कीते गेदे हे ते कन्ने हर मतदान केन्द्र पर वेबकास्टिंग दी बवस्था कीती गेदी ही। राजीव कुमार होरें मतदाताएं दी तरीफ कीती ते आखेआ जे दुए गेड़ दे मतदान च बी लोकें लोकतंत्र च अपने गैहरे विश्वास दी मसाल पेश कीती ऐ। चुनाएं दे त्रीए ते खीरले गेड़ तैह्त पैहली अक्टूबर गी बाकी रोंहदिएं 40 सीटें पर वोट पोआए जांगन। वोटें दी गिनतरी 8 अक्टूबर गी होग।

<><><><><><>

Peaceful Election

जम्मू कश्मीर विधानसभा चुनां दे दुए गेड़ दा मतदान बी पूरी चाल्ली रमानदारी आले एंगै सिर तोड़ चढ़ी गेआ ते कुदरें दा बी कुसै हिंसा जां माड़ी घटना दी कोई खबर नेई ऐ। इस गेड़ तैह्त कल कश्मीर घाटी दे त्रऊं जिलें गांदरबल, बडगाम ते श्रीनगर च फैली दिएं 15 विधानसभा सीटें ते जम्मू प्रांतै दे त्रऊं जिलें रियासी, पुंछ ते राजौरी दिएं 11एं विधानसभा सीटें लेई वोट पोआए गे। जम्मू प्रांतै दिएं 11एं सीटें च गुलाबगढ़, रियासी, श्री माता वैष्णो देवी, कालाकोट-सुदरबनी, नौशहरा, राजौरी, बुद्धल, थन्नामंडी, सुरनकोट, पुंछ हवेली ते मेंढर हल्के शामिल न। नियंत्रण रेख कन्नै लगदे राजौरी ते पुंछ दे इलाके च बी मतदान पूरी चाल्ली रमानदारी कप्पै करोआया गेआ, अजें के इनें इलाकें च पिच्छे जनेई होई दिएं किश आतंकी वारदाताएं दे चलदे आतंकवादिएं आस्सेआ चुनाएं च खलल पाने दी शैंका बरोबर बनी दी ही, जिसी ध्यानै च रखदे होई सुरक्षा दे निगगर बंदोबस्त कीते गेदे हे। दुए गेड़ दे मतदान लेई कुल 3 ज्हार 502 मतदान केन्द्र बनाए गेदे हे ते जिने लीडरें दा सियासी भविक्ख कल वोटिंग मशीनें च बंद होई गेआ उंदे च नैशन कांफ्रेंस दे उप-प्रधान ते साबका मुख्मंत्रि उमर अब्दुल्ला, बीजेपी दे प्रदेश अध्यक्ष रविन्द्र रैणा, अपनी पार्टी दे अल्लाफ बुखारी प्रमुख न।

<><><><><><>

Foreign Diplomates

15 मुल्खें दे वरिष्ठ राजनयिकें दा उच्चस्तरीय शिष्टमंडल जम्मू-कश्मीर च विधानसभा चुनाव दा जायजा लैने आस्तै जेहड़ा कल जम्मू कश्मीर दे दौरे पर आए दा हा नै चुनां प्रबंधें ते पूरी प्रक्रिया दी सराहना कीती ऐ। शिष्टमंडल च अमरीका, मैक्सिको, गयाना, दक्षिण कोरिया, सोमानिया, पनामा, सिंगापुर, नाइजीरिया, स्पेन, दक्षिण अफ्रीका, नार्वे, तंजानिया, रवांडा, एल्जीरिया ते फिलीपींस दे राजनयिक शामिल न। ज्यादातर दूतावासें दी अगुवाई उप-राजदूत ते मिशन उप-प्रमुखें कीती। अमरीका दे नमीं दिल्ली स्थित मिशन दे प्रमुख जार्गन के.एन्ड्र्यू नै आखेआ जे चुनां प्रक्रिया ते बवस्था बड़ी शानदार हीते 10एं बरें दे वक्फे दे बाद इत्थें चुनां होना इक सराहने जोग गल्ल ऐ। उनें आखेआ एह चुनां भारतीय लोकतंत्र बारे जानने दा बी शानदार मौका ऐ।

<><><><><><>

J&K LG

उपराज्यपाल मनोज सिन्हा होरें कल होए दे विधानसभा चुनावं दे दुए गेड़ च वोट पाने आले वोअरें गी मुबारकबाद दित्ती ऐ। इक सोशल मीडियो पोस्ट च उपराज्यपाल होरें रियासी, पुंछ, राजौरी, गांदरबल, बडगाम ते श्रीनगर दे वोअरें गी वोट पाने दे अपने अधिकार दा इस्तेमाल करने उप्पर बधाई दित्ती। उपराज्यपाल होरें गलाया जे लोकें दा बधी-चढ़ियें चुनां प्रक्रिया च हिस्सा लैना इस गल्ला दा सबूत ऐ जे लोक लोकतंत्र कन्नै जुड़ना चांहदे न। उपराज्यपाल होरें कल विधानसभा चुनावं दे दुए गेड़ गी निरपक्ख, शांतिपूर्ण ते आजादाना ढंगा सिर मुकम्मल कराने लेई चुनां अधिकारी, जम्मू कश्मीर पुलस ते सुरक्षाबलें दी सराहना कीती।

<><><><><><>

3rd Phase Campaigning

जम्मू कश्मीर च कल दुए गेड़ दा मतदान रमानदारी ते बवस्था आले ढंगै सिर तोड़ चढ़ी जाने दे बाद हुन सब्बने दियां अक्खी त्रीए ते खीरले गेड़ दे मतदान पर टिकी दियां न, जेहदे तैह्त पैहली अक्तूबर गी बाकी रौंहदिएं 40 विधानसभा सीटें लेई मतदान होग। बक्ख-बक्ख सियासी पार्टिएं दे लीडर ते अजाद मेदवार बी बड्डे बड्डे सियासी नेताएं, स्टार प्रचारकें ते होरने रसूखदार हस्तिएं कन्नै चुनां रैलियां , रोड शो ते बैठकां लाइयै ते घर घर जाइयै लोकें कन्नै मिलियै ज्यादा कोला ज्यादा मतदाताएं गी अपने पक्खे च करने लेई अपनी पूरी टिल्ल ला करदे न। बीजेपी दे वरिष्ठ लीडर ते गृहमंत्री अमित शाह होर चुनां प्रचार लेई अज्ज जम्मू आवा करदे न। पार्टी प्रवक्ता नै जानकारी दित्ती ऐ जे अमित शाह होर जम्मू प्रांतै दे कठुआ ते उधमपुर जिलें च कल 4 चुनां रैलिएं गी संबोधत करगंन।

ओहूदे बाद 28 सितम्बर गी प्रधानमंत्री नरेन्द्र मोदी हुंदा बी जम्मू च इक रैली गी संबोधत करने दा कार्यक्रम ऐ। लोकसभा दे विपक्ष दे नेता ते कांग्रेस दे वरिष्ठ लीडर राहुल गांधी होरें कल जम्मू च इक रैली गी संबोधत कीता। पीडीपी अध्यक्ष ते साबका मुख्मंत्री महबूबा मुफती बी कल जम्मू पुज्जियां ते अपने मेदवारें दे हक्कै च रोड शो कीता। नैशनल कांफ्रेंस दे नेता बी हुन जम्मू प्रांतै दे बक्ख-बक्ख हल्कें च प्रचार करने पर ध्यान देआ करदे न, जित्थें ओहू कांग्रेस दे समर्थन कन्ने चुनां लडै करदे न। सब्बने सियासी पार्टिं लेई जम्मू कश्मीर विधानसभा चुनां दा एह त्रीया ते खीरी गेड़ महत्वपूर्ण रौहने आला ऐ। इस गेड़ तैहत पैहली अक्टूबर गी जम्मू प्रांतै दिएं 24 ते कश्मीर घाटी दिएं 16 सीटें लेई मतदान होग। जम्मू प्रांतै दिएं इनें सीटें च जम्मू जिले दियां 11, कठुआ दियां 6, उधमपुर दियां 4 ते सांबा जिले दियां 3 विधानसभा सीटां शामिल न।

<><><><><><>

PM-Pune

प्रधानमंत्री नरेन्द्र मोदी होर महाराष्ट्र च पुणे दा दौरा लांगन। उत्थें ओहू 22 ज्हार 6 सौ करोड़ रपे शा बद्ध कीमत आली केई परियोजनाएं दा उद्घाटन करगंन ते केइएं दा नीह पत्थर रक्खगंन। प्रधानमंत्री होर जिला अदालत थमां स्वारगेट तगर चलने आली मेट्रो रेल गी झंडी दस्सियै रवाना करगंन। सुपर कम्प्यूटिंग तकनीक दे क्षेत्र च भारत गी आत्म निर्भर बनाने दी अपनी प्रतिबद्धता गी फही पक्का करदे होई प्रधानमंत्री नरेन्द्र मोदी होर राष्ट्रीय सुपर कम्प्यूटिंग मिशन तैहत देशें च विकसित तकरीबन 130 करोड़ रपे दी कीमते आले 3 परम रुद्र सुपर कम्प्यूटर राष्ट्र गी समर्पित करगंन। वैज्ञानिक अनुसंधान गी सुविधाजनक बनाने लेई एह सुपर कम्प्यूटर पुणे, दिल्ली ते कोलकाता च लाए गे न। एहूदे इलावा प्रधानमंत्री होर मौसम ते जलवायु अनुसंधान लेई तैआर इक उच्च प्रदर्शन कम्प्यूटिंग प्रणाली दा उद्घाटन बी करगंन। 850 करोड़ रपे दी एह परियोजना मौसम सरबंधी अनुप्रयोगें लेई भारत दी इस क्षेत्र च समर्थ बधाने लेई इक महत्वपूर्ण गैह ऐ।

<><><><><><>

President

राष्ट्रपति द्रौपदी मुर्मू होर अज्ज लद्दाख च सियाचिन स्थित बेस कैंप दा दौरा करगंन। इस दरान राष्ट्रपति होर उत्थें तैनात सैनिकें कन्ने गल्लबात बी करगंन। आकाशवाणी संवाददाता नै जानकारी दित्ती ऐ जे एह दौरा राष्ट्रपति मुर्मू हुंदा सियाचिन लेई पैहला दौरा ऐ ते लद्दाख च उंदी दूई यात्रा ऐ। की जे अक्टूबर 2023 च उंदी योजनाबद्ध यात्रा खराब मौसम कारण रद्द करी दित्ती गेई ही। राष्ट्रपति हुंदे लद्दाख पुज्जने पर उपराज्यपाल डॉ. बी.डी.मिश्रा, मुख् कारजकारी पार्षद लद्दाख ताशी, सांसद हनीफा जान, फौज दे ते होरने अफसर उंदा सुआगत करगंन।

काराकोरम रेंज च स्थित सियाचिन ग्लैशियर दुनिया दा सारे शा उच्चा फौजी कब्जे आला इलाको ऐ, जेह्दे चलदे भारतीय फौज नै अप्रैल 1984 च आपरेशन "मेघदूत" तैहत इस इलाके पर नियंत्रण स्थापत कीता हा।

<><><><><><>

Jai Sahnakar

भारत नै अंतर्राष्ट्रीय निर्णय प्रक्रिया, चेचा करी संयुक्त राष्ट्र सुरक्षा परिषद दे ढांचे च फौरी तौरा पर सुधारें दी जरूरता उप्पर जोर दित्ता ऐ। कल न्यूयार्क च विदेश मंत्री डॉ. एस.जयशंकर होरें जी-20 मुखें दे विदेश मंत्रिण कन्नै गल्लबात दरान गलाया जे संयुक्त राष्ट्र गी अतीत च बंदिशें च रखेआ गेआ ऐ ते विश्व दे कन्नै एहदा विकास होना लोड़चदा ऐ। उनें गलाया जे संयुक्त राष्ट्र परिषद अंतर्राष्ट्रीय शांति ते स्थिरता बनाई रखने दा अपना लक्ष्य पूरा करने च विफल रेई ऐ। एह्दे कन्नै विश्व संस्था दी प्रभावकारिता ते विश्वास नीयता च कमी आई ऐ। उनें गलाया ते ग्लोबल साउथ दी आवाज गी लोड़चदा महत्व मिलना अत्त लाजमी ऐ।

<><><><><><>

Migrant

कल होए दे विधानसभा चुनाएं दे दुए गेड़ च कश्मीर दे 3 जिले दे 15 चुनावी हल्के च विस्थापित कश्मीरी पंडत मतदाताएं दा तकरीबन 40 फीसदी मतदान दर्ज कीता गेआ। विस्थापतें रिटर्निंग अफसर हुंदे मूजब 40 फीसदी विस्थापत कश्मीरी पंडतें अपने वोट पाने दे हक्कै दा इस्तेमाल जम्मू दे 19 मतदान केन्द्रें उधमपुर दे इक ते दिल्ली दे चऊं मतदान केन्द्रें च कीता।

<><><><><><>

Snooker

भारत दे कमल चावला नै मंगोलियर दे उलानवटार च खेड्डी जा'रदी आईबीएसएफ विश्व 6 रैंड स्नूकर प्रतियोगिता गी जित्ती लैता ऐ। चावला होरें फाइनल च पाकिस्तान दे असजद इकबाल गी 6-2 कन्नै हराइयै अपना पैहला आईबीएसएफ खताब जित्तेआ। भारत आस्तै मलकीत सिंह, विद्या पिल्लई ते कीर्तन पांडियन नै त्रै कैह दे तगमे जित्ते। चावला ब'रे 2017 च इस प्रतियोगिता च उपविजेता रेह हे।

<><><><><><>